

1603 tute, fortitudine, felicitate tot bella confecerat, victoriasque reportaverat, egregium Regis munus ad Senatum detulit. Id honoris atque regiae benevolentiae in Rempublicam argumentum cum pergratum Patribus extitisset, ad eum officii plenas literas dedere. Thoraca aliaque arma, quibus regium obtectum corpus obarmataque dextera praeclara adeo facinora ediderat, summo animi gaudio accepta, & ad invicti Regis memoriam posteritatisque documentum, uti pretiosa quaeque adsolent, conservaturos. Iis perbenigne Henricus summum in Rempublicam studium voluntatemque testatus respondit. Regiam armaturam in Decemvirum armamentario nobili loco reponendam Senatus jussit.

M. DC. IIII.

1604

*Mehemetis
Turcarum
Imp. obitus
& Achomati
successio.*

ANni vero insequentis initio, qui a parta salute M.DC.III. fuit, a Francisco Contareno, Reipublicae legato, Byzantio literae allatae, Mehemetem Turcarum Regem tertiodecimo kal. januarii repente, nullo praeveniens morbo, e vita sublatum: ei Achomatem, qui nondum quartum ac decimum aetatis annum attigerat, successisse: adolescentem in populi conspectum datum, stupori plerisque fuisse, qui ingentis imperii habenas pueros nunquam arripuisse memorabant. Principum legati qui Byzantii commorabantur, ad eum visendum, amplissimorumque regnorum successionem gratulatum confluxere. Contareno idem officii genus paucis per interpretem obivit: praesens Halis, Memphiticus Bassa, quem ad Visiratum paulo ante Mehemetes pater evexerat, Venetorum in Ottomanos Reges amicitiam studiumque laudibus extulit; eos uti amicos habendos tractandosque affirmavit, Rege non semel capite annuente, quod in superbo Ottomanorum fastu, qui nunquam affari, perraro oculos conjicere in Principum legatos solent, pro insueto habitum. In alloquio Contareno Regi recto capite praeter morem adstitit. Senatus ordinem legatum, qui & aditum regnum Achomati gratularetur, & pacem renovaret, Joannem Mocenicum, Equitem, legat.

*Joannes
Mocenicus
ad Achomatem
orator.*

Ceterum regni illius primordia a Persa illata repente armatur-